

AKHBAR : UTUSAN MALAYSIA

HARI : SELASA

TARIKH : 9 JANUARI 2007

ARKIB : 10/01/2007

PM: Institut Kanser Negara penuhi keperluan rakyat

Oleh Habibah Omar dan Helmi Mohd. Foad

PUTRAJAYA 9 Jan. Datuk Seri Abdullah Ahmad Badawi berkata, Institut Kanser Negara yang akan dibina di sini dirancang pembinaannya bagi memenuhi keperluan kesihatan rakyat negara ini.

Menurut Perdana Menteri, jumlah penghidap kanser adalah ramai dan penubuhan institut itu merupakan antara langkah kerajaan menyediakan rawatan kepada penghidap kanser.

Kerajaan mesti mendapatkan kemudahan dan peralatan yang diperlukan selain doktor-doktor yang ada kepakaran dalam bidang rawatan kanser.

Semua itu mesti dirancang dengan baik semasa bangunan di peringkat pembinaan lagi, katanya selepas upacara pecah tanah projek Institut Kanser Negara di sini hari ini.

Hadir sama pada majlis itu ialah Menteri Kesihatan, Datuk Seri Dr. Chua Soi Lek.

Institut berharga RM340 juta itu yang bakal beroperasi dalam tempoh dua tahun lagi akan menjadi pusat rujukan utama penyakit kanser yang lengkap dengan 252 katil pesakit.

Ia mempunyai pelbagai kemudahan berteknologi tinggi setaraf dengan institut kanser luar negara dengan inovasi yang menitikberatkan konsep mesra pesakit dan pelawat.

Antara kemudahan yang bakal disediakan di hospital itu ialah perkhidmatan onkologi dan radioterapi, perubatan nuklear, pembedahan onkologi, rawatan paliatif dan harian.

Ditanya sama ada penubuhan institut itu mempunyai maksud yang istimewa kepadanya memandangkan isteri beliau, Allahyarham Datin Seri Endon Mahmood meninggal dunia pada 22 Oktober 2005 akibat kanser, Perdana Menteri berkata:

Begitulah, tetapi ia bukan eksklusif untuk saya atau perasaan saya. Ia mengenai apa yang rakyat mahu.

Penyakit kanser, katanya, hanya akan difahami sekiranya ada ahli keluarga yang menghidap kanser.

Malah beliau sendiri memahaminya setelah melihat penderitaan Allahyarham Endon ketika berdepan dengan penyakit itu.

Dalam ucapannya pada majlis berkenaan, Perdana Menteri meminta supaya perancangan membina institut tersebut dibuat dengan baik kerana beliau ingin melihat pembinaannya menjadi kenyataan.

Saya berharap pelaksanaannya menjadi elok dan tidak terbengkalai serta tidak berlaku kelewatan kerana sebagai kerajaan berjiwa rakyat, kita akan memberikan perkhidmatan yang baik bagi membuktikan kemampuan kita.

Projek ini dijalankan di bawah inisiatif pembiayaan swasta (PFI), jadi saya minta ia diawasi dengan rapi dan sebaik-baiknya.

Pelaksanaannya kena diawasi oleh Kementerian Kesihatan serta Jabatan Kerja Raya (JKR), katanya.

Abdullah berkata, doktor-doktor dan kakitangan institut itu perlu menjalani latihan sama ada di dalam atau luar negara bagi membolehkan mereka memperoleh pengalaman serta pengetahuan yang secukupnya untuk mengendalikan peralatan canggih rawatan kanser di situ kelak.

Mengenai perubatan alternatif bagi merawat kanser, Perdana Menteri memberitahu, peranan doktor tradisional yang mempunyai pengalaman perlu dilihat secara positif kerana mereka juga boleh membantu melegakan penderitaan pesakit kanser.

AKHBAR : BERNAMA

HARI : SELASA

TARIKH : 9 JANUARI 2007

Perdana Menteri Sempurnakan Majlis Pecah Tanah Institut Kanser Negara

Am

09 Januari, 2007 15:39 PM

PUTRAJAYA, 9 Jan (Bernama) -- Datuk Seri Abdullah Ahmad Badawi hari ini membuktikan komitmen kerajaan menangani barah dengan melakukan upacara pecah tanah bagi pembinaan Institut Kanser Negara berharga RM340 juta di sini yang dijangka siap dalam tempoh dua tahun.

Perdana Menteri, yang kehilangan isterinya Datin Seri Endon Mahmood akibat kanser payu dara pada 2004, berkata bahawa apabila disebut saja nama penyakit itu, ia akan membuatkan orang ramai takut tetapi jika rawatan yang diberikan beresesuaian dan pada peringkat yang sepatutnya, pesakit berpeluang untuk sembuh.

"Yang penting ialah kita perlu memberi sokongan dan faham masalah pesakit kanser," katanya pada majlis pecah tanah itu.

Pada sidang akhbar kemudiannya, Abdullah berkata daripada satu segi, institut berkenaan amat bermakna kepada beliau tetapi perasaan beliau tidaklah penting memandangkan institut itu dibina bagi menyediakan rawatan berkualiti tinggi kepada rakyat.

Pada 2005, jemaah menteri meluluskan pembinaan institut itu yang akan mempunyai 252 katil. Ia dibina berdasarkan inisiatif pembiayaan swasta.

Terletak berhampiran Hospital Putrajaya, institut itu akan menjadi pusat kecemerlangan bagi rawatan dan penyelidikan berkaitan kanser selain memberi tumpuan kepada aspek pencegahan dan latihan.

Antara perkhidmatan yang bakal disediakan ialah onkologi dan radioterapi, perubatan nuklear, pembedahan onkologi, rawatan paliatif dan khidmat rawatan harian yang komprehensif.

Dianggarkan 40,000 kes kanser dikesan setiap tahun, dan penyakit itu mengakibatkan 9.54 peratus daripada semua kematian di hospital kerajaan pada 2004 berbanding 7.37 peratus pada 1975.

Selain rawatan moden, institut itu juga menawarkan rawatan tradisional dengan kerjasama sebuah hospital latihan di bawah Universiti Beijing.

Perdana Menteri berkata walaupun ia merupakan projek pembiayaan swasta, urusan kawal selia perlu dilakukan oleh Kementerian Kesihatan dan agensi berkaitan yang lain bagi menentukan ia disiapkan mengikut jadual.

Menteri Kesihatan Datuk Seri Dr Chua Soi Lek pula berkata Abdullah bersetuju supaya khidmat pakar kanser dari luar negara digunakan kerana Malaysia menghadapi kekurangan doktor seperti dalam bidang onkologi.

Katanya kerajaan sedang mengambil langkah menambah bilangan ahli onkologi daripada 37 orang sekarang bagi memenuhi nisbah Pertubuhan Kesihatan Sedunia iaitu 1: 250,000 berbanding 1: 750,000 di negara ini.

Chua berkata 80 peratus daripada kes kanser di negara ini dikesan apabila pesakit sudah berada di peringkat terakhir penyakit itu, dan ini menyukarkan usaha rawatan.

-- BERNAMA